

論語傳註序

論語傳註成作而嘆曰於戲吾乃今而知孔子之所以爲萬世師也孔子承堯舜禹湯文武周公之傳所自居者好古敏求斯文在茲其教人學則詩書禮樂兵農行則孝弟仁義忠信篤敬莫可易矣而其爲後世坊又何知之神慮之遠也不語上不言性天罕言命仁則知後世專以講性談天爲事者誤矣其論誦詩也曰雖多亦奚以爲則知專以誦讀爲學者左矣且存心養性並不之及惟教之言忠信行篤敬存養自在其中又子夏以灑掃應對進退之末爲始以本爲卒是不惟上達不輕傳卽下學亦循循有序則知立本以及末與本立而末自舉之說皆過矣使後之儒者世守其傳而不變少則習幼儀務謹信長則禮樂不斯須去身求志以此達道以此不驚高遠不徒佔畢禮樂何由亡躬行何由衰異端何由昌熾民物何由沉淪而學術道傳何以日歧而日墮也哉大學

中庸則論語之義疏也論語言明親之道已具而剴然臚列其先後則在大學孔子始於下學終以一貫始於志學能立不惑終以知天命耳順從心所欲不踰矩則學者原有達天之候但躡等求之必作竊語躡他塗故聖人慎焉至子思時性天之說棼起不實指之橫議惑世何所折衷故中庸以天命起以天載終而中實以子臣弟友禮儀威儀使知高遠必自卑邇上達不離下學皆庸常非隱怪而聖道上下盡矣無可益矣出此卽異端矣嚮承先孝愍命遊顏習齋先生之門教以從事下學今忽忽老矣乃見聖道如此故妄言之以俟後之學者傳者謂有所受也自孔門傳論聖道後散考之先儒而躬承於父師也注註也果聖道不入歧路則因文註釋如水之注地霈然而相通也

康熙五十七年冬十月己酉蠡吾後學李嚮頓首拜撰

凡例

一去聖遠而道術晦漢唐註疏詳於訓詁略於體要宋明儒者又各尋入門之路率牽聖言以就其說而道多歧轍矣故不得已而有此註

一學不明則經旨不明論語曰學詩學禮內則曰學樂學禮學書計學射御經文昭然也若後儒以讀書爲學則經文所無且以誦詩徒多爲戒矣程子亦謂玩物喪志矣以講性天爲學則經明有不語罕言之防矣以力行爲學則學原以爲行也但各有其功論語曰行有餘力則以學文中庸言學而知之行而成功不可溷併以蹈冥行詳辯具顏先生存學編及拙註大學辨業聖經學規內一道至周孔而盡其教人之言亦盡後儒或言發往聖所未發誤也往聖尙有不知與知其當誨而不盡言何以爲聖矣出往聖者必異端之教也經言所無者莫由學其庶乎

一聖經專以訓士如論語首言學朋來人知大學言明親中庸言位育皆士之職也以下皆然不及農工商者待士治也卽在士之兵農禮樂中也後儒教人四民齊施則一視士與齊民等僅自好而止一不知民不可使知亦學術錯誤之一證也

一窮經將以致用也體國經野禮樂制度地考官名皆致用之大者不可空言理而湮其實也茲註雖非專書大義則必載

一孔子曰辭達又曰旨遠言文後人梵語鄉談一概入註則蕪穢聖經矣不文何以能達是註盡洗之

一註惟道是視不敢盡附舊說然道若大路人可知行矜新好異非所云也襟註時論而不辯惟在好學深思者領解耳

一用舊註而微易其辭者皆有至理非敢漫更

一訂修則憚臯聞校閱則方鐵壺張肄六王宗洙及馮辰弟培謹志不忘

己亥仲夏敬識

論語傳註

蠡縣李堪著

孔門弟子論譔孔子之語以傳後世故曰論語

註疏分二十篇

學而第一

子曰學而時習之不亦說乎有朋自遠方來不亦樂乎人不知而不愠不亦君子乎

子孔子宋孔父嘉之後氏孔不書者聖德著聞人所共知也

邢疏

亦有書孔子

者記者隨筆不爲例也古禮大夫稱子因之尊師曰子公羊傳子沈子是也

或當時共傳稱之後人亦因而稱之孟子稱顏子曾子是也若面言論語於

同儕稱子孟子於門人亦稱子則男子通稱也

馬說

學效於人子貢謂賢者識

大不賢者識小夫子焉不學是也卽自學詩書禮樂亦效法古人也習重也

卽易習坎之習學而又學也說卽悅不亦乎歎其必有此妙也

皇氏侃曰學有三時一身中時內則十年出就外傳居宿於外學書計十有三年學樂誦詩舞勺十五成童舞象學射御二十學禮是也二年中時王制春秋教以禮樂冬夏教以詩書文王世子春誦夏弦秋學禮冬學書三日中時學記君子之於學藏焉修焉息焉游焉是日日所習也同門曰朋包解不知不知其有學也愠怒也學本以應人知而春秋以降或不知矣亦無愠焉所性定也君子謂德可君國子民也詩疏後遂以爲有德之通稱詩於天子亦稱君子論語於學士曰君子是也時習學而不厭也朋來誨人不倦也不知不愠不怨天不尤人邈世不見知而不悔也此學之準也

有子曰其爲人也孝弟而好犯上者鮮矣不好犯上而好作亂者未之有也君子務本本立而道生孝弟也者其爲仁之本與

有子孔子弟子名若魯人孝順父母弟盡弟道犯干犯也上分在己上者務事事也人能孝弟卽少犯上不作亂是仁本孝弟之象矣故承之而斷其爲仁之本以見孝弟不可不務也天地之大德曰生人之至道曰仁仁卽生德也孝報我所生也弟愛吾同生也施之生意油然而及於民物矣語曰孝爲百行之源本此

子曰巧言令色鮮矣仁

巧好其言令善其色剛毅木訥之反也發露多則存蓄少工飾多則真醇少故鮮仁

曾子曰吾日三省吾身爲人謀而不忠乎與朋友交而不信乎傳不習乎

曾子弟子

凡言弟子卽孔子弟子省文也

名參字子輿南武城人省察也忠盡心也信言必

實也傳師傳也此曾子忠恕之學也人身當省不止三者曾子此時從遊聖

門除傳習之外則樂羣謀謨耳故日省如此

子曰道千乘之國敬事而信節用而愛人使民以時

道治也千乘諸侯之國周禮小司徒九夫爲井四井爲邑四邑爲丘四丘爲甸四甸爲縣左傳昭公五年遠啟疆論晉車賦有云十家九縣長轂九百其四十縣遺守四千乘是一縣一百乘也縣方十六里中二百五十六井約二井半出一乘

毛河右說

古封國不計山川附庸故王制曰名山大澤不以封所謂

力百里者就井地言則萬井當出三四千乘惟言千乘者言任戰不言備也如天子千里爲百里者百止言萬乘可見敬小心也事禮樂兵農之事人兼臣民言

子曰弟子入則孝出則弟謹而信汎愛衆而親仁行有餘力則以學文

弟子童年之通稱也謹慎信實汎廣親加厚也仁謂仁人餘力未盡之力文

詩書禮樂射御書數也

朱註

言弟子之職行與學皆宜力也出跟入孝自膝下

出也

子夏曰賢賢易色事父母能竭其力事君能致其身與朋友交言而有信雖曰未學吾必謂之學矣

子夏弟子卜商衛人易輕也賢賢重其德也易色輕其色也此敦夫婦之別

也

邵子昆說

致如致仕之致委身與君也雖曰必謂設駁而深贊之言盡倫必自

學問入也

子曰君子不重則不威學則不固主忠信無友不如己者過則勿憚改

不端重則無威嚴而學亦不堅固故君子以重爲貴而忠信其主也益友其輔也改過其功也忠實心也信言必行也友所以輔仁不如己則無益而有損無毋通憚畏也

朱註

曾子曰慎終追遠民德歸厚矣

喪盡哀禮祭盡誠敬

註疏

君子篤厚於親之德也民化之德亦歸厚矣

子禽問於子貢曰夫子至於是邦也必聞其政求之與抑與之與子貢曰夫子溫良恭儉讓以得之夫子之求之也其諸異乎人之求之與

子禽弟子陳亢陳人子貢弟子姓端木名賜衛人溫厚良易直恭莊敬儉

節制讓謙遜

註朱

五者夫子之盛德接乎人者也時君感之自以政來質是夫

子自操得之之權也非邦君有心而與豈夫子有意以求卽或曰求亦求以溫良恭儉讓耳與人之屈節者天淵矣諸與皆語辭春秋稱大夫皆曰夫子孔子曾爲大夫故有此稱

子曰父在觀其志父沒觀其行三年無改於父之道可謂孝矣

此觀人子之法也父在不得自專但觀其志父沒乃觀其行之善惡然沒而

子三年在喪

孔解

於父之道可姑行者不忍改之斯謂之孝不然親甫沒而變

更是有死其親之意矣所行卽善而心亦薄矣豈孝也哉

有子曰禮之用和爲貴先王之道斯爲美小大由之有所不行知和而不可以禮節之亦不可行也

和和樂也先王之道卽禮也斯指和也小曲禮大經禮由之由和也知和而和亦不可行者如稽康阮籍之流放誕嬉戲以爲高致終至喪亡是也言禮貴和而和又不可流蕩也

有子曰信近於義言可復也恭近於禮遠恥辱也因不失其親亦可宗也

信約信復踐言恭致敬禮節文近依也合也因緣也就也宗主也所因不失可親之人亦可以宗主之也言人之言行交際當審之於始而慮其所終不然將不勝其自失之悔矣

朱註

子曰君子食無求飽居無求安敏於事而慎於言就有道而正焉可謂好學也已

不求安飽者好不在是也敏速也事學之事也爲學之人恆多言故又慎之有道有道德者正正其所學也

子貢曰貧而無諂富而無驕何如子曰可也未若貧而樂富而好禮者也子貢曰詩云如切如磋如琢如磨其斯之謂與子曰賜也始可與言詩已矣告諸往而知來者

可猶言亦可也貧而樂顏淵也富而好禮魯聖衛武公也子貢以貧富有守爲美聞子言未若遂知義理無窮學問莫足故引衛風淇澳之詩如切而又如磋如琢而又如磨以證之是告往而知來也

子曰不患人之不已知患不知人也

人不己知無損於己何患不知人則窮無與交達無所舉故患之人汎言下
論以能應人知則指操知遇之權者言

爲政第二

子曰爲政以德譬如北辰居其所而衆星共之

政正人之不正也德行道而有得也北辰北極天之樞也居其所不移也而
衆星拱向卽所謂子帥以正孰敢不正言爲政本於身也

子曰詩三百一言以蔽之曰思無邪

思無邪魯頌駉篇之辭此言可蓋全詩者國風好色而不淫小雅怨誹而不

亂

史記

發乎情止乎義理

子夏詩序

無邪思也況於大雅以歌王政三頌以形祖德

愈無邪矣此詩教也

王氏道說

或謂桑中溱洧非邪思歟曰作歌以刺其事使天

下萬世共醜焉是無邪也

子曰道之以政齊之以刑民免而無恥道之以德齊之以禮有恥且格

道引導政法制禁令齊一之也免者不敢爲惡以苟免刑罰也齊禮者立冠婚喪祭之儀定五倫相接之度使賢者俯而就不肖者跂而及也格至也民恥於無德無禮且至於有德有禮也較之徒尙政刑者淳漓大有間矣故申韓之術可以苟定反側不可以常享太平

子曰吾十五而志於學三十而立四十而不惑五十而知天命六十而耳順七十而從心所欲不踰矩

古十五而入學學志者念茲在茲也學習大學明親之道而不厭也立學之固也不惑學無所疑也天命天之元亨利貞之德也知者下學而上達也耳順聲入心通無所違逆不思而得也矩爲方之器隨心所欲而不踰於方不

勉而中也

朱註

此孔子之年譜也

孟懿子問孝子曰無違樊遲御子告之曰孟孫問孝於我我對曰無違樊遲曰何謂也子曰生事之以禮死葬之以禮祭之以禮

孟懿子魯大夫仲孫何忌懿諡孟僖子之子樊遲弟子樊須齊人僖子卒時詔懿子學禮於孔子故懿子問孝而子以無違於親告之使其順親之指以學禮也毛河右說然而從親學禮順親之一事而已豈遂盡孝不知孝親卽有禮焉生事葬祭不可過分是也恐懿子未解故語樊遲以發之舊註作無違於禮則聖人作度辭矣

孟武伯問孝子曰父母惟其疾之憂

武伯魯大夫懿子之子名彘武諡言當謹疾以慰親也

子游問孝子曰今之孝者是謂能養至於犬馬皆能有養不敬何以別乎

子游弟子姓言名偃吳人言但以能養口體爲孝則雖不常供者至於犬馬